

faamalolo i e mama'i, faapupula i e tauaso, ma faatutu mai e na oti.”¹⁰

O i tatou, o uso o le Ekalesia, tatou te le savalia auala o Palesitina e faamalolo ai e mama'i, ae e mafai ona tatou tatalo ma faaoga le alofa faamalolo o le Togiola i se sootaga ua ma'i ma atuatuvaile.

E ui e le mafai ona tatou faapupulaina se tauaso i le auala [na faia ai] e le Faaola, ae e mafai ona tatou molimau atu i le ata o le faaolataga i e ua tauaso faaleagaga. E mafai ona tatou faapupulaina mata o lo latou malamalamaaga i le manaomia o le mana o le perisitua i feagaiga e faavavau.

O le a tatou le faatutuina e ua oti e pei ona faia e le Faaola, ae e mafai ona tatou faamanuia ē ua maliliu e ala i le sailia o lo latou suafa mo galuega faalemalumalu. Ona mafai moni lea ona tatou faatutu i latou mai i lo latou faalepuipui o agaga ma ofo atu ia i latou le ala o le ola e faavavau.

Ou te molimau atu o loo i ai so tatou Faaola soifua, o Iesu Keriso, ma e ala i Lona mana ma le malamalama o le a mafai ai ona tatou tuleia i tua le pogisa o le lalolagi, tuuina atu le leo i le upumoni ua tatou iloa, ma faatosina mai isi e o mai ia te Ia. I le suafa o Iesu Keriso, amene. ■

FAAMATALAGA

1. M. Russell Ballard, “Alii ma Tamaitai ma le Mana o le Perisitua,” *Liahona*, Sete, 2014, 36.
2. Harriet R. Uchtdorf, *The Light We Share* (Deseret Book Company, 2014), 41; faaogaina i se faatagaga.
3. Thomas S. Monson, “Aua Sa Ou Tauaso, a o Lea Ua Ou Pupula,” *Liahona*, Iulai 1999, 69.
4. Mataupu Faavae ma Feagaiga 50:24.
5. Mataupu Faavae ma Feagaiga 88:7.
6. George Q. Cannon, i le *Preparing to Enter the Holy Temple* (booklet, 2002), 36.
7. Mosaia 3:19.
8. D. Todd Christofferson, “O Le Malosiaga Amiotonu o Tamaitai,” *Liahona*, Nov. 2013, 30.
9. Mataupu Faavae ma Feagaiga 4:2.
10. “O Le Keriso Soifua: O Le Molimau a le Au Aposetolo,” *Liahona*, Ape. 2000, 2.



Saunia e Peresitene Dieter F. Uchtdorf

Fesoasoani Lua i le Au Peresitene Sili

Ola Fiafia i le Talalelei

Ia faalagolago atu i le mana faaola o Iesu Keriso; tausī i Ana tulafono ma poloaiga. I se isi faaupuga—ola fiafia i le talalelei.

Ou tuafafine pele, au uo pele ma soo faamanuiaina o Iesu Keriso, ua faamamaluina au i lenei avanoa e faatasi ai ma outou a o tatou tatalaina le isi konafesi aoao a Le Ekalesia a Iesu Keriso o le Au Paia o Aso e Gata Ai. I le vaiaso agafua nei o le a feiloai ai le Au Peresitene Sili ma Aposetolo e Toasefululua ma le Au Pulega Aoao uma ma taitai aoao o ausilali, ma o sauniga o loo totoe o la tatou konafesi aoao i le lalolagi atoa o le a sosoo ai i le Aso Toonai ma le Aso Sa a sau. Ua matua ou faafetai lava ia Peresitene Thomas S. Monson, le perofeta a le Atua mo o tatou aso, mo le faatonuina o au e fai ma sui o le Au Peresitene Sili ou te lauga atu i tuafafine o le Ekalesia.

A o ou mafaufau ai i mea ou te ono tau atu, sa ou toe mafaufau i tua i tamaitai na mamaluina lou olaga ma fesoasoani ia te au i taimi o luitau o le olaga faaletino. Ou te faafetai mo lou tina matua o le na filifili i le tele o tausaga ua mavae e avatu lona aiga i se sauniga faamanatuga a Mamona. Ou te faafetai mo Sister Ewig, o se tina matua nofotoatasi i Siamani, o lē a faaliliu lona igoa i le FaaSamoa o “Tuafafine Faavavau”. O ia lea na tuuina atu lenei valaaulia lototele ma le matagofie i lo'u tina matua. Ou te matua faafetai tele mo lo'u tina, o

le na taitaia ni fanau se toafa i taimi o faigata o le Taua Lona Lua a le Lalolagi. Ou te mafaufau foi i lo'u afafine, ma afafine o la'u fanau, ma tupulaga o lumanai o tamaitai faamaoni o le a mulimuli mai i se aso.

Ma ioe, ou te faafetai lava e faavavau i lo'u toalua, o Harriet, o le na tosina mai ia te au a o ou talavou, ma tauave ni avega sili ona mamafa o lo ma aiga o se tina, tu faatasi ma au o se āvā, ma alofa ma faapelepele i le ma fanau, fanau a fanau, ma fanau a fanau a fanau. Ua avea o ia ma malosiaga i lo ma aiga i taimi uma o le lelei ma le leaga. Na te aumaia le susulu o le la i olaga uma o e e iloaia o ia.

Ma le mea mulimuli, ou te faafetai lava ia te outou uma, o le faitau miliona o tuafafine faamaoni o soo se vaitausaga i le lalolagi atoa o loo faia le tele o mea e fausia ai le malo o le Atua. Ou te faafetai ia te outou mo au ala le mafaitaulia o loo outou musuia, faafailele, ma faamanuia ai i latou o siomiaina outou.

O Afafine o le Atua

Ou te fiafia lava i le faatasi ai ma le toatele o afafine o le Atua. A tatou usuina le pese “O Au o se Atalii o le Atua,” e ulufia o tatou loto e ona upu. I le mafaufau loloto ai i lenei upumoni—o i tatou o fanau a ni matua

faalelagi¹—e faatumulia ai lava i tatou i se lagona o le tupuaga, faamoemoe, ma le taunuuga.

E lelei ona manatua e avea pea outou ma afafine o le Atua. O lenei malamalama o le a e maua ai le malosi i taimi sili ona faigata o lou olaga ma o le a musuia ai oe ia ausia ni mea ofoofogia. Peitai, e taua foi ona manatua o le avea ai ma se afafine o ni matua faalelagi e le o se tulaga ese e te mauaina po o se mea o le a e mauaina. O le a avea pea oe i taimi uma ma faavavau o se afafine o le Atua. O loo i ai ni faamoemoe maualuluga o lou Tama Faalelagi mo oe, ae o lou tupuaga paia lava ia *na o ia* e le mautinoa ai sou tofi paia. Na auina mai oe e le Atua iinei e saunia mo se lumanai e sili atu i lo soo se mea e mafai ona e mafaufauina.

O faamanuiaga folafolaina a le Atua i e faamaoni e mamalu ma musuia. O nisi o na faamanuiaga o “nofoalii, malo, itumalo, ma mana, ma puleaga, o mea maualuluga uma ma loloto.”² Ma e sili atu i lo na o se pepa fanau faaleagaga po o se “Pepa o Sui Auai o se Atalii o le Atua” e agavaa ai mo nei faamanuiaga le mafaamatalaina.

Ae faapefea ona tatou mauaina?

Ua tali e le Faola lenei fesili o i tatou taimi:

“Vagana ua outou ola i la’u tulafofono e le mafai ona outou maua lenei mamalu.

“Aua e vaapiapi le faitotoa, ma lautitiiti le ala e tau atu i le faaeaga. . . .

. . . Ia outou talia, la’u tulafofono.”³

Mo lenei mafuaaga, tatou te tautatala ai e uiga i le savavali i le ala o le avea ma soo.

Tatou te tautatala e uiga i le ususitai i poloaiga a le Atua.

Tatou te tautatala e uiga i le ola fiafia i le talalelei, ma o tatou loto atoa, manatu, mafaufau, ma le agaga atoa.



E Silafia e le Atua se Mea Tatou te Le Iloa

Ae mo nisi o i tatou, o le ususitai i poloaiga a le Atua e le o taimi uma e lagona ai le fiafia tele. Tatou te ioe i ai: atonu e i ai nisi e foliga mai e faigata atu pe le fiafia tele i ai—o poloaiga tatou te taulimaina i se naunautaiga faatamaitiiti o loo saofai i luma o se ipu o fualaa taumafa mata maloloina ae ita i ai. E ū o tatou nifo ma fosi i tatou lava ia usitai ina ia mafai ai ona tatou see atu i nisi gaoioiga sili atu ona manaomia.

Masalo i ni taimi faapenei atonu tatou te oo ai ina fesiligia i tatou lava, “E manaomia moni ea ona tatou ususitai i poloaiga *uma* a le Atua?”

O la’u tali i le fesili lenei e faigofie lava:

Ou te manatu e silafia e le Atua se mea tatou te le iloina—o mea e sili atu ma lo tatou tomai e malamalama i ai! O lo tatou Tama i le Lagi o se tagata e faavavau o lona silafia, poto, ma le atamai e le mafuatia le maoae i lo tatou.⁴ E le gata i lena, ae e alofa, agalelei, ma taulai atu o Ia e faavavau i le sini faamanuiaina e tasi: ia aumaia lo tatou tino ola pea ma le ola e faavavau.⁵

I se isi faaupuga, e le gata ua Ia *silafia* le mea silisili mo oe; ae o Lona faanaunautaiga foi e *finagalo ia e filifili* le mea silisili mo oe.

Afai e talitonu o outou loto i le mea lenei—afai tou te talitonu moni lava i le misiona sili a lo tatou Tama Faalelagi ia faaeaina ma faamamaluina Ana fanau ma ua Ia silafia le auala silisili e faia ai—pe le talafeagai ea la le taliaina ma le mulimuli i Ana poloaiga, e oo lava i poloaiga ia e foliga mai e faigata? Pe le tatau ea ona

tatou faatauaina molī faailoilo ua Ia tuuina mai e taiala ai i tatou i le pogisa ma tofotofoga o le olaga faaletino? Ua latou faailogaina le ala e toe foi atu ai i lo tatou aiga faalelagi! E ala i le filifilia o le ala a le Tama Faalelagi, ua e faataatia ai se faavae paia mo lou alualu i luma faaletagata lava ia o se afafine o le Atua lea o le a faamanuiaina ai oe i lou olaga atoa.

Ou te manatu, o se vaega o lo tatou luitau o lo tatou mafaufau lea o loo lokaina e le Atua Ana faamanuiaga uma i se ao tele i luga i le lagi, ma e musu e aumai ia i tatou sei vagana ai ua tatou tausisia nisi o tulafofono mamafa e leai se tuusaoloto ua Ia faatulagaina. Ae e leai ma se tulaga faapena o i ai i poloaiga. O le mea moni, o loo liligi mai e le aunoa e le Tama Faalelagi faamanuiaga i o tatou luga. O lo tatou fefefe, masalosalo, ma le agasala, ua pei ai o se faamalu le polokaina o nei faamanuiaga mai le oo mai ia i tatou.

O Ana poloaiga o ni faatonuga agaalofa ma o se fesoasoaniga faalelagi e faamoe ai le faamalu, ina ia mafai ai ona tatou taelee e le aunoa i faamanuiaga faalelagi.

E manaomia ona tatou taliaina o poloaiga a le Atua ua le na o se lisi umi o ni manatu lelei. [O poloaiga] e le o ni “māūnu faatogafiti o le olaga” mai se poloka i le Initoneti po o ni upusii faatupu lagona mai se itulau o le Pinterest. [O poloaiga] o ni fautuaga faalelagi, ua faavae i luga o upumoni e faavavau, ua tuuina mai e maua ai le “filemu i le lalolagi lenei ma le ola e faavavau i le lalolagi a sau.”⁶

O loo i ai la se tatou filifiliga. I le isi itu, o loo i ai manatu o le lalolagi

faatasi ma ana filosofia fesuisui ai i taimi uma atoa ai ma ona faamoemoe ga le mautonu. Ae o le isi itu, o loo i ai le afioga a le Atua i Lana fanau—Lona poto e faavavau, Ana folafolaga mautinoa, ma Ana faatonuga agaalofo mo le toefoi atu i Lona afioga i le viiga, alofa, ma le mamalu.

E pule la oe i lau filifiliga!

O Le Fofoa o vasa, oneone, ma fetu le mafaitaulia o loo aapa atu ia te oe i lenei lava aso! O loo Ia ofoina atu le fua faatatau silisili e maua ai le fiafia, filemu, ma le ola e faavavau!

Ina ia agavaa mo nei faamanuiaga mamalu, e tatau ona e faalotomauualoaina oe lava ia, faaoga le faatuatua, ma tauave i ou luga le suafa o Keriso, saili atu ia te Ia i upu ma galuega, ma ia naunau e “tutu o ni molimau a le Atua i taimi uma ma i mea uma, ma i nofoaga uma.”⁷

O Le Mafuaaga e Usiusitai Ai

O le taimi lava tou te malamalama ai i le natura moni o le Atua ma Ana poloaiga, o le a outou malamalama atili ai foi ia te outou lava atoa ai ma le faamoemoe ga paia o o outou olaga. Faatasi ai ma lenei mea, o le a suia ai le faaosofia o oe e mulimuli i poloaiga, ma avea ai ma manaoga o lou loto le ola fiafia ai i le talalelei.

Mo se faataitaiga, o i latou e vaai atu i le auai i sauniga a le Ekalesia o se auala patino e faateleina ai lo latou alolofa i le Atua, maua ai le filemu, siitia ai isi, saili atu ai i le Agaga, ma toe faafou ai lo latou tautinoga e mulimuli ia Iesu Keriso, o le a mauaina se aafiaga sili ona loloto nai lo i latou e na ona faapasi taimi lava i luga o nofoa. Tuafafine, e *matua taua* tele lo tatou auai i a tatou sauniga o le Aso Sa, ae ou te mautinoa lava e sili atu ona popole lo tatou Tama Faalelagi i lo tatou faatuatua ma le salamo nai lo faamaumauga o le auai.



O le isi faataitaiga lenei:

O se tina nofotoatasi e toalua sana fanau laiti sa taia talu ai nei i le misela. Ioe, sa lei pine ae faama’ia ai foi lana fanau. O le galuega o le tausia o ia ma lana fanau laiti e na o ia lava sa toetoe lava a le gafataulimaina mo lea tina talavou. Ma, o se taunuuga, o le fale sa masani ona mamā na avea ma se fale palapalā ma gasu. Sa faaputupu ipu palapalā i le fata ipu, ma fau solo le tagamea i soo se mea.

A o tauivi ai o ia ma lana fanau fetagisi—ma sa manao foi o ia e tagi—sa tuitui mai le faitotoa. O ana faiaoga asiasi. Sa mafai ona la vaaia le mafatia o le tina talavou. Sa mafai ona la vaai atu i lona fale, ma lana umukuka. Sa mafai ona la faalogo atu i le fetagisi mai o le fanau.

Ia, ana faapea sa pau le mea na popole i ai nei tuafafine na o le faamaeaina o le la asiasiga atofaina faalemasina, semanu na o lo la tauaoo atu lava i le tina o se ipu kuki, ma fai atu ua misia lava o ia i le Aualofa i le vaiaso ua tea, ma fai atu se tala faapea, “Faailoa mai ia i maua pe a i ai se isi mea e mafai ona ma faia!” Ona la o ese atu loa lea ma le fiafia, ma le faafetai ua 100 pasene foi le la asiasiga o lea masina.

O le mea e lelei ai, o nei tuafafine o ni soo moni o Keriso. Sa la matauina manaoga o lo la uso ma faaoga loa i ai le tele o a la taleni ma o la poto masani. Sa la faamamaina le gasu, faasusulu atu le malamalama ma le manino i le fale, ma valaau atu i se uo

e fai mai se faatauga o mea sa sili ona manaomia. Ina ua faamaeaina le la galuega ma faatofa atu, sa la tuua lena tina talavou i loimata—o loimata o le agaga faafetai ma le alofa.

Na amata mai lena taimi, o manatu o le tina talavou e uiga i faiaoga asiasi sa suia. Sa ia fai mai, “Ua ou iloa nei e le o au o se tasi o mea e tau na ona faailoga i se lisi o mea e fai a se tagata.”

Ioe, e manaomia ona faamaoni faiaoga asiasi i le faataunuaina o a latou asiasiga faalemasina, ia faia uma e aunoa ma le misia o le *mafuaaga* sili ona taua o loo i tua atu o lenei poloaiga: ia alofa atu i le Atua ma uso a tagata.

A tatou taulimaina poloaiga a le Atua ma la tatou vaega i le fausiaina o Lona malo e pei o se mea e tau na ona fai o loo i luga o se lisi o mea e fai, ua tatou misia le uiga moni o le avea ma soo. Tatou te misia le tuputupu ae lea e sau mai le ola fiafia i poloaiga a lo tatou Tama i le Lagi.

O le savali ai i le ala o le avea ma soo e le manaomia ona avea ma se aafiaga oona. E “sili ona suamalie i luga o mea uma ua suamalie.”⁸ E le o se avega e lafotuina ai i tatou i lalo. O le avea ma soo e siitia ai o tatou agaga ma faamalieina ai o tatou loto. E musuia ai i tatou i le faatuatua, faamoemoe, ma le alofa mama. E faatumulia ai o tatou agaga i le malamalama i taimi o le pogisa ma le filemu i taimi o le faanoanoa.

Na te aumaia ia i tatou le mana faalelagi ma le olioli tumau.

Ola Fiafia i le Talalelei

Ou tuafafine pele i le talalelei, pe ua 8 pe 108 ou tausaga, o loo i ai se mea se tasi ou te faamoemoe ua e malamalama moni i ai ma iloa:

E alofagia oe.

E pele oe i ou matua faalelagi.

E silafia oe e le Fofoa e faavavau ma lemafua o le malamalama ma le ola! E manatu mai o Ia ia te oe.

Ioe, e alofa le Atua ia te oe i lenei lava aso ma aso uma.

E le o faatalitali o Ia seiloga e te faatoilaloina ou vaivaiga ma mausa leaga ona faatoa alofa atu lea ia te oe. O loo alofa o Ia ia te oe i le taimi nei faatasi ma se malamalamaaga atoia i au tauiviga. Ua Ia silafia o loo e aapa atu ia te Ia i le tatalo faamaoni ma le faamoemoe. Ua Ia silafia taimi na e pipiimau ai pea i se faatuatua ua tau mou atu ma talitonu pea—e oo lava i le lotolotoi o le pogisa faateteleina. Na te silafia ou mafatiaga. Na te silafia lou salamo mo taimi na e sasi ai pe toilalo ai. Ma o loo alofa mai pea o Ia ia te oe.

Ma o loo silafia e le Atua ou tulaga manuia; e ui atonu e faatauva ia te

oe, ae Na te faamamaluina ma faataua-ina ia mea taitasi o na mea. E alofa o Ia ia te oe mo lou fesoasoani atu i isi. E alofa o Ia ia te oe mo lou aapa atu ma fesoasoani i isi e tauave a latou avega mamafa—e ui lava o loo e tau-ivi foi oe ma ou foi luitau.

E silafia e Ia mea uma e uiga ia te oe. E manino Lana silafaga ia te oe—Na te silafia oe i lou tagata moni lava. Ma e alofa o Ia ia te oe—nei ma aso uma!

E te manatu ea e afaina i lo tatou Tama Faalelagi pe mananaia au vali, lavalava, lauulu, ma atigilima? E te manatu ea e suia lou taua ia te Ia e fua i le toatele o tagata e taumulimuli ia te oe i luga o le Instagram po o le Pinterest? E te manatu e finagalo o Ia e te popole pe faanoanoa pe a le toe uo mai pe le toe mulimuli mai nisi ia te oe i le Facebook po o le Twitter? E te manatu o le aulelei mai fafo, le telē o lou ofu, po o le lauiloa e faia ai sina eseesege teisi i lou taua i Le na fofoa-ina le atulaulau?

E alofa o Ia e le gata mo le tagata ua i ai oe i lenei lava aso, ae faapena

foi mo le tagata o le mamalu ma le malamalama lea e te maua ai le gafatia ma le manao e avea ai.

E sili atu i lo mea e mafai ona e mafaufauina, e finagalo o Ia ia e ausia-ina lou taunuuga—ia toe foi atu i lou aiga faalelagi i le mamalu.

Ou te molimau atu o le ala e ausia ai lenei mea o le tuu ese lea o mana-oga faaloloto ma faanaunautaiga le aoga ae ia ositaulaga ma auauna atu i isi. Tuafafine, ia faalagolago atu i le mana faaola o Iesu Keriso; tausii i Ana tulafono ma poloaiga. I se isi faa-upuga—ola fiafia i le talalelei.

O lau tatalo ia outou lagonaina se fuataga faafouina ma faalateleina o le alofa matagofie o le Atua i o outou olaga; ia outou mauaina le faatua-tua, naunautaiga, ma le tuuto atu ia aoao i poloaiga a le Atua, faatauaina i o outou loto, ma ola fiafia ai i le talalelei.

Ou te folafola atu a e faia lea mea, o le a e iloina lou lava tagata silisili—lou lava tagata *moni*. O le a e iloina le uiga moni o le avea ma se afafine o le Atua e faavavau, le Alii o le amio-tonu uma. Ou te molimau atu ai i lenei mea ma tuu atu lau faamanuiaga i le avea ai ma se Aposetolo a le Alii, i le suafa o Iesu Keriso, amene. ■

FAAMATALAGA

1. O le Atua e le na o Ia o lo tatou Faipule ma Le Fofoa; o Ia foi o lo tatou Tama Faalelagi. O alii ma tamaitai uma o ni atalii ma ni afafine moni o le Atua. Sa aoao mai Peresitene Iosefa F. Samita e faapea, “o tagata, i le avea ai o se agaga, sa pele ma fanau mai i ni matua faalelagi, ma tausii ina ia matua i le maota e faavavau o le Tama, a o lei oo mai i le fogaleele i le tino faaletino ina ia maua ai aafiaga faaletino” (*Aoaoga a Peresitene o le Ekalesia: Iosefa F. Samita* [1998], 346).
2. Mataupu Faavae ma Feagaiga 132:19.
3. Mataupu Faavae ma Feagaiga 132:21–22, 24.
4. Tagai Isaia 55:9.
5. Tagai Mose 1:39.
6. Mataupu Faavae ma Feagaiga 59:23.
7. Mosaea 18:9.
8. Alema 32:42.



Sobral, Pasila